

東
華
續
錄

臣王先謙敬編

臣張式恭恭校

十一月庚戌朔諭內閣總理各國事務衙門奏請派員前往有約各國辦理中外交涉事務一摺據稱花翎記名海關道志剛樸實懇摯器識閎通銜記名繁缺知府禮部郎中孫家穀老成勤謹穩練安詳以之出使洵堪勝任等語此次出差事屬初始自應量示優異志剛孫家穀均著賞加二品頂帶孫家穀並賞戴花翎卽派該二員前往有約各國充辦理中外交涉事務大臣以重委任○諭軍機大臣等本日據穆騰阿馳奏梟匪北竄設法鈔截一摺梟匪於上月二十八日竄至涿州東南一帶經知府張銘帶領團練出城迎截穆騰阿督兵追至該逆由茨村竄越清河向東南逃

竄該都統見已帶兵折回固安著卽確探賊蹤所向迅速馳擊總以由北而南偏令南趨毋任逸出邊外是爲至要所帶馬步各隊如有退縮不前者無論官兵著卽以軍法從事苟能奮勇殺賊亦著從優請獎以示勸懲劉長佑見在行抵何處何以未聞跟追亦並無奏報逆騎竄近涿州該督尙如此延緩玩愒殊甚著卽趕緊督帶所部與穆騰阿會合夾擊務期就地殄除以贖前愆儻仍前貽誤則咎由自取朝廷亦不能再爲寬貸也賊蹤見竄順天府屬地方萬青黎王榕吉當勤加偵探並激勵鄉團設法堵截不可專以剿捕事宜委諸各營將士涿州知州張銘甫經到任尙未接印卽能帶練出城截賊尙稱奮勇該州紳董踴躍從戎深明大義殊堪嘉尙著萬青黎等查明出力紳董奏請鼓勵以昭激勸將此由五百里各諭令知之○諭裕瑞桂成奏蒙古官兵擊退越邊竄匪

趙長齡奏布置河防情形各一指甘省回匪有分股竄晉搶掠並
於封河時由草地來包頭歸化城之說該匪既眾且悍亟宜嚴防
以杜紛竄沿邊一帶地廣兵單實有防不勝防之慮宣化一軍正
在直省剿辦梟匪無可抽撥其察哈爾右翼距綏遠城較近之西
四旗內著杜嘎爾揀選精壯兵丁一千名派令參領勲德恩圖都
布巴札爾畢都爾業副參領布音吉爾噶勒管帶取道草地迅赴
綏遠城聽候裕瑞等分撥協防以厚兵力昨據左宗棠等奏捻逆
竄入北山經官軍分路截剿疊獲勝仗並分兵扼其偷竄黃河之
路雖匪勢漸絀而沿河地段太長時須防其潛渡著左宗棠庫克
吉泰喬松年劉典懷遵前諭嚴檄在事各軍實力剿除並於黃河
口岸認真堵遏毋任擾越晉疆裕瑞等務當督飭在防兵勇時加
戒備不可稍涉大意口外防餉積欠甚鉅值此防剿喫緊之際豈

容稍有拖欠著趙長齡按月源源籌解毋令缺乏晉省防務經趙長齡督飭陳湜分籌堵禦尙稱完密天寒冰結處處宜防見在兵勇漸集仍著該撫檄令該臬司嚴督將士堵剿兼施以固邊防將此由六百里諭知左宗棠庫克吉泰喬松年裕瑞桂成杜嘎爾趙長齡並傳諭劉典知之○命杜嘎爾選兵一千名赴綏遠城協防○廣江西吉安府學額一名長甯縣十名○壬子李鴻章奏賊於安邱雒縣之交經我軍擊敗後向諸城南趨劉銘傳督率馬步各軍奮勇兜躡十月二十二日追至日照地方馬勇槍傷僞魯王任柱尙不甚重該逆徑奔江南贛榆縣境劉銘傳同善慶等於二十四日追抵贛榆城下任逆豫伏悍賊數萬於城南我軍分東西兩路而進天忽大霧昏不見人該逆突分數大股蠲擁撲來善慶等攔頭迎擊衝殺三四次幾不能支劉銘傳親督先鋒馬勇將賴牛

兩股擊敗復督步隊上前接應任逆自率馬賊數千直鈔我後經善慶等分隊擊回該逆猶率親兵步賊并死拒敵劉銘傳善慶嚴督馬步各軍大呼殺入槍礮如雨賊中忽自驚喊曰魯王受槍傷死矣眾賊登時潰散我軍乘勢趕殺但見一羣悍逆圍簇任逆屍身用快馬負馱而去餘眾狂奔我軍追殺二十餘里擒斬極多伏屍遍野據降賊供稱任逆被槍子洞穿腰肋斃命劉銘傳善慶等仍督隊窮追以期盡殲賊黨查偽魯王任柱卽任化邦係亳州積年巨捻所帶藍旗馬步悍賊最多四年四月親王僧格林沁曹南之挫據疊次擒賊降賊皆供該逆尤與僧親王死關者臣屢密屬劉銘傳等懸賞購綫使其自相戕殺若軍士能於陣前擒殺該逆許以破格保獎並賞銀數萬兩劉銘傳前於安邱戰勝後函稱有逆酋潘貴升專人寄信願謀殺任逆贖罪圖功等語此次據報任

逆死於亂軍槍礮之中或謂係官軍洋槍擊斃或謂卽係潘貴升
暗槍中傷容俟查明再行覈辦見在潘鼎新唐仁廉已先後由
州日照向南追剿郭松林楊鼎勳自濟甯拔隊由滕嶧徑趨鄒
皖軍程文炳等亦由鄒城就近迎剿臣督催各軍星夜馳往與劉
銘傳前後夾擊並飭下游運河及六塘河防軍嚴加堵守勿任
越臣俟劉銘傳等續報賊情稍定或再馳赴南路相機籌辦所有
此次陣殲巨逆之提督劉銘傳等分別開列懇恩獎勵 上諭內
閣李鴻章奏官軍追賊大獲勝仗陣斃逆首一摺逆首任柱卽任
化邦積年巨捻悍黨最多竄擾數省疊抗官兵實屬罪大惡極此
次身被顯戮洵足申天討而快人心著李鴻章督飭各軍乘此聲
威四面兜剿務將各匪迅圖掃蕩以竟全功直隸提督劉銘傳忠
勇耐勞追賊迅速著加恩賞給白玉柄小刀一把火鏹一箇大荷

包一對小荷包兩箇副都統善慶著加恩賞穿黃馬褂已革副都統溫德勒克西著開復原官仍交軍機處記名遇有副都統缺出請旨儘先簡放其餘出力各將弁著李鴻章飭令劉銘傳等查明奏請獎勵○諭軍機大臣等穆騰阿奏連日剿匪獲勝情形崇厚奏派隊協防黃河北岸擬與東省分段認防及見籌派隊防剿各摺片覽奏均悉梟匪由涿州竄擾永清等處穆騰阿分飭各將士沿途兜擊十月二十九日該匪竄至霸州兩間房地方經阿克敦孝順各率所部會同知州宋維光帶領團練擊敗復折回迎撲官軍連番追擊賊向三橫村德勝口一帶狂竄其各團練擊獲各匪均經訊明正法剿辦尙屬得手惟該匪趨向靡定見在意欲竄過渾河仍應乘機進剿以絕根株著穆騰阿嚴檄阿克敦等覘賊所向實力窮追毋稍鬆勁劉長佑見已繼至卽著飭令所部會合穆

騰阿所派各軍互相聯絡以期前截後追就地殲滅崇厚亦當於
渾河東北面趕緊設防並飭在防將弁遇賊卽擊毋任該匪乘隙
偷渡又肆蔓延崇厚奏協防黃河與東省分段設防以專責成各
情著卽相機布置並會同劉長佑飭知張樹聲等認真防守所籌
防勦各節尙屬周妥著嚴飭鄧啟元鄭明保認真巡防不可稍形
鬆懈將此由五百里各諭令知之○諭張之萬奏六塘河分段扼
守情形及賊竄贛榆並請撥清淮餉需各摺片所稱六塘河扼守
各營布置尙屬嚴密見在捻逆由東省南竄於十月二十一日已
竄至贛榆邊馬直抵城根青口寨外亦有賊馬數十騎往來遊弋
清淮各軍布守河防勢難抽調李鴻章前於濰縣之捷已飭銘鼎
兩軍會合追剿並令郭松林楊鼎勳取道沂郯合力兜擊計尙不
至落後著卽迅督諸軍乘勝齊進務須再接再厲使該逆不遑喘

息以遏狂氛皖營程炳文所部卽著李鴻章英翰督令會同淮軍
併力殲勦王正起等軍偪賊南竄並著丁寶楨飭令探蹤繼進迅
赴戎機張之萬卽飭海州青口駐防水陸各營嚴密堵遏與追師
聯絡夾擊見在河水未涸清淮防務尙有把握惟逆蹤剽悍張之
萬務當通飭沿河各營妥籌扼擊毋任竄突清淮協餉無著張之
萬以金陵釐局月協甘餉三萬兩之款於本年十二月可將江海
關借項抵清擬自明年正月爲始於此款內勻撥一萬五千兩以
顧清淮餉需下餘一萬五千兩仍協甘省著會國藩斟酌緩急妥
爲籌撥以保完善清淮軍事餉事該督均須統籌兼顧一切防勦
機宜並著隨時與張之萬悉心籌布以臻周妥正在寄諭間據李
鴻章馳奏劉銘傳善慶等軍追賊至贛榆城南大獲勝捷槍斃逆
首任化邦等情追勦尙爲奮勇任逆爲著名悍賊見在兗渠授首

賊膽愈塞布政使潘鼎新貴州安義鎮總兵唐仁廉已先後由莒州日照向南兜追郭松林楊鼎勳由滕嶧徑趨郯沂程文炳亦由郯城就近迎剿著李鴻章迅催各軍倍道星馳與劉銘傳前後夾擊務須乘此銳氣將該逆就地聚殲毋任再行鉅走又據崇厚奏齊河以下隄段綿長直省無兵可調東省僅有趙三元等水陸三營兵力單薄請飭李鴻章丁寶楨於封河以前撥兵防守齊河下游與張秋一帶直省防軍分段認守等語見在河防雖形稍鬆然轉瞬河冰凍結捻逆靡定亦不可不豫籌著李鴻章丁寶楨將齊河下游妥籌備豫以專責成將此由六百里各諭令知之○癸丑諭內閣前因直隸臬匪滋事直隸總督劉長佑未能迅速剿捕致令日肆蔓延疊經降旨將劉長佑革職畱任並摘去頂帶以示薄懲乃近據穆騰阿奏報臬匪日漸北趨由涿州竄抵永清霸州等

處雖經官軍及各州縣團練小有斬擒而以數百烏合之眾縱橫
奔突且匪黨漸增至千餘實屬不成事體劉長佑身膺疆寄有負
委任著卽行革職交官文差遣委用責令帶隊自效以贖前愆○
諭軍機大臣等本日已明降諭旨將劉長佑革職命官文署理直
隸總督官文未到任以前所有近省防務及地方一切事宜著鍾
秀妥籌辦理不可稍涉疏虞穆騰阿在霸州一帶剿匪獲捷正可
乘勝進攻以絕根株聞該匪已竄過渾河該都統何以不跟蹤追
擊著穆騰阿迅速進兵兼程躡剿毋令該逆喘息崇厚務當懷遵
疊次諭旨酌度機宜迅籌掃蕩劉長佑部下各營及所帶親兵仍
著妥爲駕馭協同剿洗會籌滅賊之方該前督受恩深重不准因
奉有革職諭旨稍形諉卸致誤事機儻所部因管帶失宜滋生事
端必惟劉長佑是問正在寄諭間據劉長佑奏梟匪折向東南督

兵會剿並籌備黃防丁寶楨奏捻趨江境見赴下游查勘黃防各
摺片梟匪見由霸州回竄永清有濫過渾河擾及東安之信黃仁
遵等均已跟蹤過河分道追截著穆騰阿督率各隊會同直隸兵
勇協力圍剿毋稍鬆勁穆騰阿崇厚當隨時飭令劉景芳劉祺等
聯絡聲援以資得力黃防固屬緊要而梟匪飄忽靡常尤不可不
迅速殄滅以靖畿輔著崇厚斟酌情形應否添撥兵勇之處妥籌
布置丁寶楨所陳捻逆南竄情形與李鴻章前奏相同劉銘傳昨
已追至贛榆復獲大捷將任逆殲斃恐該匪回竄東境丁寶楨仍
嚴飭王正起等相機堵剿該撫見已行抵濟河查視黃防卽著妥
爲布置與直隸張秋以上防軍通力合作各專責成將此由六百
里諭知穆騰阿丁寶楨崇厚並傳諭鍾秀劉長佑知之○諭劉嶽
昭奏官軍攻拔牛場堽苗巢平遠州境肅清並擬進駐畢節取道

入滇各摺片平遠州牛場壘爲苗匪巢穴山路險歧經劉嶽昭派兵攻擊並將另股援賊殲斃多名九月十四日飭軍由人頭山穴潛達賊巢賊匪倉卒驚覺官軍斬關而進殺賊二千餘人當將牛場壘老巢全行攻克生擒首逆潘先森等正法剿辦尙爲得手逆首楊孔明是否燒斃仍著劉嶽昭確查嚴捕毋任漏網平遠全境肅清善後事宜尤爲緊要著曾璧光飭令該地方文武實心經理岑毓英業已行抵曲靖所派兵勇先已到滇人心應稍安定惟迤西賊勢狡猾楚雄等處軍事尤緊劉嶽昭仍當迅將白泥壘等處匪眾剋期掃蕩早日入滇毋得頓兵賊壘藉端延宕致滇事又生他變並著曾璧光速派兵勇至遵義清鎮等處接防俾劉嶽昭得調回原營以厚兵力將此由五百里各諭令知之○以官文署直隸總督

由大學士署

○甲寅諭軍機大臣等戶部奏請飭滇臨江

海各省解錢籌銅一摺前因銅斤缺乏鼓鑄當十大錢原爲一時權宜之計行之日久不無流弊近來市廛行使暗中折減於國用民生均有未便惟欲規復圓法必須籌備制錢京師自通行大錢以來所有制錢大都運往外省若欲鼓鑄新錢又非一二年所能驟復戶部議令濱臨江海各省籌解制錢實爲便捷之法前經譚廷襄函商湖北督撫擬於鹽釐項下酌提制錢由輪船運津據稱事屬可行此外如江西江蘇浙江廣東四省均有海船可通各該省釐金較旺自可一律提解著曾國藩郭柏蔭英桂馬新貽瑞麟蔣益澧李瀚章何璟劉坤一各於鹽卡釐卡收款內每年酌提制錢三十萬串由輪船裝運天津交崇厚擇地嚴密收存聽候提用酌提錢文准照銀價劃抵應解京餉其制錢一千合銀若干及運腳若干卽著各該督撫迅速議定具奏所提之錢務須年清年款

以兩年爲止不准稍有短解此項錢文卽名爲天津練餉以昭慎重不可稍有宣露致令外來商民傳播都城有礙錢法是爲至要其湖北施宜等處向多銅礦著該督撫飭屬招商試辦酌抽礦稅試行有效卽籌款收買商銅以裕鼓鑄並著妥議章程具奏至濱海商賈向有販運紅銅條銅等項應如何招商收買之處並著各該督撫三口通商大臣安連議奏將此諭會國藩英桂瑞麟李瀚章馬新貽郭柏蔭劉坤一蔣益澧崇厚並傳諭何璟知之○諭駱秉章奏援黔宜擇將帥一摺黔省下游各匪兆琛李元度等剿辦一年並無成效劉峴前已令席寶田募勇萬人赴黔接替並擬將前派援黔各營分別撤畱曾經諭令照辦見據駱秉章奏請飭令總兵王永章已革提督成大吉與席寶田各募勇五千人赴黔著劉峴斟酌情形辦理或令王永章成大吉各增募數千或於席寶

田所募萬人中分交王永章管帶共成一萬五千之數由席寶田等分統入黔先將荊竹園賊巢攻拔以次進至貴陽所有援軍攻剿情形仍由劉崐奏報以一事權李元度等各營應如何分別撤留以節餉需之處仍著劉崐遵奉前諭辦理遵義一帶賊巢卽著駱秉章飭令川防之安吉忠字各營由綦南入黔與遵義防兵合力先將廟壩等處匪窟攻拔與楚師夾攻荊竹園老巢並著增調川兵數營以厚兵力劉嶽昭業已肅清黔西見在移軍大定惟滇省杜逆鴟張省城軍情甚急著仍遵前諭俟大定軍事稍竣卽統率所部赴滇以顧大局貴陽附近賊巢駱秉章當飭川省援軍由遵義一帶兼顧會璧光亦當籌兵與川軍兩面夾擊並嚴防省垣毋稍疏懈黔省吏治敗壞已久地方牧令苛擾閭閻驅民從賊深堪痛恨會璧光務當慎選循良拊循綏輯以固本原貪酷各員據

實嚴參重辦不可稍事姑息本日復據兆琛奏請陞見並請獎卹出力陣亡員弁兵勇各摺片兆琛前據劉崐參奏業經被議著劉崐飭令該員於軍事交卸後卽行回旗其奏請陞見摺一件著劉崐給還所保各員名著劉崐覆覈具奏如有實在出力者仍准覈實保獎駱秉章原摺著鈔給劉崐等閱看兆琛請獎出力各員弁兵勇摺片各一件單三件兆琛請陞見摺一件均著交劉崐欽遵辦理將此由五百里各諭令知之○予貴州陣亡參將雷得貴陝西陣亡提督李祥和等祭葬世職○乙卯諭軍機大臣等神機營奏進剿接仗情形請將帶兵觀望之員懲處並請嚴申軍律各摺片副都統富和統帶吉林官兵馳抵永清縣北閣驛剿賊因兵數較單與直隸帶隊官劉景芬約會同進該副都統業將賊匪擊敗跟追二十餘里劉景芬並不出隊接應該副都統所帶之隊爲賊

圍裹致有挫失劉景芬之隊近在咫尺竟觀望畏蒞坐視不救迺出情理之外深堪痛恨著穆騰阿確實查明嚴參懲辦毋稍徇隱近來各路軍營於帶兵貽誤各員每多姑息隱庇以致兵懦將驕釀成巨患若不嚴申紀律何以整飭戎行所有直隸帶兵各員及所部各軍如有觀望畏蒞不肯合力勦辦者卽著穆騰阿據實嚴參按照軍律懲辦以警惰玩該都統既有督帶之責自當破除情面嚴申紀律以肅戎政不得代人受過儻稍有瞻徇別經發覺惟該都統是問神機營原摺片各一件均著鈔給閱看將此由五百里諭令知之○諭李瀚章等奏婁雲慶一軍見未整頓就緒暫難速往東省一招據稱婁雲慶開招各營半係霆營舊勇半係就地招募舊勇固須認真振刷新勇尤宜加意訓練會國藩將霆營未撤之十四營以九營歸鄧訓誥統帶以五營撥交婁雲慶統領飭

由樊城移赴黃州鄧訓誥尙無拔隊日期等語新勇訓練未成固
難強之就道見在東省勦擒獲捷任柱被官軍轟斃賊氣已奪亟
須多集兵力一鼓殲除著會國藩檄催鄧訓誥統帶各營刻卽拔
隊馳赴黃州會同婁雲慶將新舊各軍趕緊訓練務須紀律嚴明
壁壘一新以備折衝之用並著李瀚章何璟轉飭婁雲慶俟鄧訓
誥所部到齊迅卽整理就緒馳赴山東聽候李瀚章調遣不得遲
誤李鴻章仍遵前旨飛速迎提以期多多益善早奏膚功將此由
五百里諭知會國藩李鴻章李瀚章並傳諭何璟知之○丙辰諭
軍機大臣等劉長佑奏匪竄西南見跟蹤追剿一招梟匪瀟過渾
河後竄撲武清復由河西務竄向東安之舊州劉景芳陳濟清黃
仁遺均係追賊之員未見與賊接仗該員等究竟所辦何事殊堪
痛恨昨據神機營奏稱富和於初四日在渾河南岸進剿劉景芳

並不援應致有挫失業經諭令穆騰阿將劉景芬嚴參懲辦此次劉長佑所奏則初四日之戰陳濟清亦帶隊追賊何以不就近策應顯有退縮不前情事著穆騰阿劉長佑會同查明一併據實參奏直隸兵弁疲玩已極劉長佑見在尙未交卸仍當力圖整頓並將剿賊事宜認真經理不得稍存諉卸賊匪肆意奔突縱橫自如地方官聽賊往來竟同無事實屬不成事體劉長佑見已飭令南路各府州募勇一營實力堵剿嗣後該匪經過地方該城文武如再畏葸縱賊不思邀擊該管道府不能督飭所屬隨時堵禦卽著穆騰阿會同直隸總督將該道府一併據實嚴參毋稍寬貸將此由四百里諭知穆騰阿並傳諭劉長佑知之○諭左宗棠奏和厚兩營遇回失利並遏捻東竄情形暨騎賊闖入安塞縣城各摺片此次官軍進剿因山路險峻以致遇回失利傷損將弁多人雖經

劉松山等尋蹤追擊而該逆業已遠颺其大股捻逆仍分擾宜川延長等處是回捻互爲擾亂竄北竄東均未可定著左宗棠庫克吉泰喬松年檄催劉松山等軍分途鈔截使回捻不得相結就地殲除劉典亦當督飭將士嚴扼洛川宜君一帶以遏逆蹤紛竄晉省河防曾經諭令趙長齡飭令陳湜妥爲防範此時宜川延長一帶賊蹤麇集逼近河壩尤不可不加意嚴防著趙長齡傳知該臬司嚴督所部晝夜梭巡探明何路警急迅卽相機堵剿如因防守不密致逆匪竄擾晉疆惟趙長齡陳湜是問左宗棠仍當隨時兼顧力保完善不得以驅賊出陝爲了事前據裕瑞等有回匪欲於封河時由草地竄包頭歸化城之奏已令裕瑞等撥兵分防惟歸綏一帶兵力尙單著趙長齡迅催前調之太原大同兩鎮兵二千名趕緊前赴裕瑞軍營以資厚集裕瑞桂成務當於包頭等鎮要

隘處所力籌堵禦毋任回眾乘間內犯以致防剿益難勞山賊匪由膚施縣境闌入安塞縣城左宗棠已檄高連升馳赴延綏一帶截剿著卽飭令該提督趕緊進攻毋令久踞該處失陷情形並著左宗棠查明具奏將此由六百里論知左宗棠庫克吉泰裕瑞喬松年趙長齡桂成並傳諭劉典陳湜知之○丁巳諭軍機大臣等穆騰阿奏連日剿擊梟匪情形一摺梟匪竄過渾河擾及武清穆騰阿派翼長富升等馳渡渾河由東北兜擊該匪竄過西岸向西南一帶逃逸卽著穆騰阿嚴飭馬步各軍盡力追剿並著咨會劉長佑派兵合力截擊飭令南路各府州募勇助剿務期迅殄逆氛另片奏請將在事人員酌保等語此次賊由渾沱北竄該將弁等未能迎頭扼截致令竄過渾河騷擾近畿一帶雖小有斬擒功過尙不足相抵除在霸州接仗出力各員仍准該都統擇尤存記俟

獲有大勝彙案請獎毋許冒濫外各營中如有畏葸退縮之員仍遵前旨查明參奏本日又據崇厚奏請令富和總統各起馬隊並籌備餉銀撥給洋槍隊協剿一摺富和前已飭令帶領新到吉林隊七百餘名赴穆騰阿軍營隨同剿賊其餘吉林及黑龍江馬隊俟全數到齊後再行斟酌調遣崇厚擬備餉需四萬兩卽著照數備齊聽候撥動洋槍隊一營卽著撥給富和以厚兵力直隸余承恩等軍著崇厚咨行劉長佑飭令實力會剿不准仍前玩泄穆騰阿亦當分撥兵旅防剿兼施不得任賊蔓延將此各諭令知之○李鴻章奏贛榆之捷逆首任柱陣斃前已馳陳大略嗣據劉銘傳文稱十月二十四日追抵贛榆城下探知賊眾全伏東南數里外當派善慶溫德勒克西由城東進陳振邦徐邦道陳鳳樓等由城西進陳振邦等甫過西關正遇牛賴兩股馬步賊數千攔擁而來

陳鳳樓等當率馬勇迎擊唐定奎步隊趕上衝殺劉銘傳復派劉盛休等接應其時善慶馬隊已與任逆接仗劉銘傳又派劉克仁等步隊由城北繞出賊後以分其勢未幾牛賴兩股敗走惟任逆尙與善慶劉克仁等惡戰不退劉銘傳親率勇隊策應忽見降酋潘貴升躍馬大呼曰任柱已槍斃矣賊眾驚譟遂大潰奔各軍乘勢追殺擒斬千餘名旋有藍旗馬賊二千餘人出降供稱任逆正在指揮督戰忽槍子洞穿腰肋而斃次日僞王宗賴賜幅率三千餘騎來降所供任逆陣斃情形亦同並稱賊中因任柱已死甚形慌亂羣推賴汝洸爲首等語查潘貴升係任柱內五營頭目前於安邱戰勝後密信約降遂投入陳鳳樓馬步營內願殺任逆圖功是日接仗正酣該降酋密商馬隊哨官鄧長安於煙霧之際冒充賊中旗號混入賊陣乘任逆督戰不暇後顧施槍中斃飛馬回陣

善慶等卽乘勢率隊猛進緣賊騎眾多未及搶獲屍身捻逆頭目以任柱爲最悍今已陣殲其餘較易勦辦劉銘傳等前已懇恩獎勵該軍馬步隊疊次打仗尤爲出力相應開列籲懇 天恩俯准

給獎以示鼓勵至潘貴升以降酋謀殲逆首忠義可嘉先經劉銘傳允以保獎並賞銀二萬兩除咨商兩江督

臣

曾國藩由糧臺籌

給賞銀外可否懇恩准以千總補用並賞戴花翎加遊擊銜出自

逾格 鴻施又奏據潘鼎新稟報十月二十七日追賊至贛榆沙

河寨探知賊在海州境內次日進至海屬之上莊鎮正遇賊股北

竄該司卽派戴春林馬隊伏於後面樹林中以潘國揚等六營由

中路迎敵吳從發兩營當左路張景春兩營當右路潘鼎新兩營

與聶桂榮等四營接應賊先以馬隊左右包鈔經張景春等奮力

擊退賊馬步大股由正面壓下吳從發屹立不動潘國揚等被賊

大股猛衝潘鼎新趕帶親軍馬隊督催回殺各營鼓譟齊進賊卽潰奔我軍追殺三里餘忽被馬賊將前隊壓回潘國揚立斬先退者二人各營併力兜進賊遂大敗戴春林乘勢由後路猛追縱橫盪決殺傷甚多斃賊約二千餘人內有步賊悍酋任金保亦係任柱之族也是晚收隊後任逆內五營李宗詩馬賊出降五百餘人劉銘傳一軍已由贛榆追至郟城之羽山與潘鼎新仍分路緊追唐仁廉馬隊已於十一月初二日由沂州前進會合潘鼎新截剿郭松林楊鼎勳大隊亦抵郟城諸路軍勢漸合剿撫兼施當可以次得手見在賊勢盤旋海流宿郟之交似圖撲下游運防幸防軍已有準備游軍亦漸到齊一經併力會剿難保不伺隙北趨臣疊飭各軍互相約會務趁任逆殲斃眾賊解體之時迅速兜剿使賊不遑喘息其投降馬步人眾妥爲安插解散以孤其黨而分其勢

冀收廓清之效 上諭李鴻章奏賊匪在海沈宿郊一帶盤旋窺伺官軍業已厚集正當乘此聲威併力會剿著李鴻章飭令劉銘傳等軍分路齊進迅圖兜擊並嚴飭潘鼎新督率所部奮勇圖功不得頓兵遷延任意粉飾致誤戎事賊眾趨向靡定張之萬當會商會國藩悉力豫備毋令賊匪深入擾及完善英翰務飭皖省防剿各軍加意堵擊使賊無從奔突庶可一鼓聚殲此時賊有圖撲下游之勢雖防軍已有準備李鴻章仍當隨時偵探防範毋稍大意丁寶楨見在齊河查勘黃防著妥爲布置迅速肅事仍督東軍會同剿賊毋任該匪回竄又致蔓延將此由五百里各諭令知之

○諭裕瑞桂成奏賊蹤逼近榆林河保一帶喫緊見撥兵前往堵遏各情一摺陝捻勢漸北趨神木府谷等處與晉之河保僅隔一河口外一望沙漠尤屬無險可憑裕瑞等見由包頭托克托城各

防所抽撥官兵共五百名統交參將桓昌帶赴河保一帶著卽飭令該參將迅速前往毋稍延玩該將軍等仍當懷遵昨日諭旨與左宗棠趙長齡等悉心籌商相機布置並嚴飭所派將士於包頭等鎮要隘處所加意巡防不可稍涉疏懈一面飛飭馬陞確探賊蹤就見有兵力妥爲堵禦將此由五百里各諭令知之○以槍斃逆首予降人潘貴升以千總補用加遊擊銜賞花翎○己未諭軍機大臣等穆騰阿奏賊匪南竄迎剿情形請將薩凌阿畱營並請賞假各摺片梟匪全股由雄縣南竄鄭州經官兵截剿該匪竄至任邱雙塔村等處焚掠疊經官兵進擊轟斃多名復向高陽一帶奔竄著穆騰阿飭令派出之官兵星夜窮追設法邀截並著官文於到任後嚴飭直隸各軍實力會剿務期四面兜擊趕緊殄滅不得有名無實穆騰阿因病暫時請假見當追剿喫緊之時仍著力

疾從戎不得稍涉懈弛薩凌阿雖無別項劣蹟惟既不洽眾情帶隊豈能得力著卽飭令回京毋庸再行畱營新城鄉團齊隊迎勦斃賊甚多奮勇可嘉著官文查明出力紳勇奏獎陣亡練勇四十名業經穆騰阿給銀撫恤仍著官文查明請卹將此由五百里各諭令知之○庚申諭軍機大臣等左宗棠奏覆陳甘肅餉事通籌陝甘全局俟軍行入甘卽當接篆任事並西甯撫局難恃各摺片據稱穆圖善見飭林壽圖撤西安糧臺悉以餉事歸秦安糧臺又分撥山西河東協餉歸雷正綰委員守催而以涇軍餉事寄之雷正綰恐涇軍先存疑慮若令慶涇各軍概取給於秦安糧臺又鞭長莫及且用兵西北必多籌運道以備不虞似此專注漢中秦安一路設有梗阻必致貽誤等語所籌深中窾要見設西安之甘肅後路糧臺卽著左宗棠飭令林壽圖妥爲辦理毋庸遽議裁撤

其甘肅改設之糧臺卽責令就近轉輸川湖餉米以資撥運穆圖善務將甘軍覈實察驗撙節支用總計每月約實需餉糧若干咨明左宗棠商辦左宗棠亦當彼此兼顧源源接濟俾免譁潰之虞甘軍雖有一百四十營之多據左宗棠奏稱楊岳斌去甘之先多已逃潰見在存勇斷不及半著穆圖善切實查覈毋任各營官按籍索餉致涉虛冒各營兵丁缺額暫時毋庸添募以節餉需左宗棠速將捻逆剿除並陝甘交界之回節節掃蕩馳赴甘境將該省兵餉勦撫各事宜實心籌辦以副委任並著穆圖善俟左宗棠入甘後卽將總督關防派員齎送該督軍營八月十六日河狄回逆叛圍蘭省情形著穆圖善據實查奏仍隨時與左宗棠面商妥辦左宗棠奏喬松年接據總兵黃武賢函稱西甯危殆情形撫局已有不能敷衍之勢著穆圖善查明據實具奏仍一面咨照玉通會

籌辦法以遏亂萌黃武賢原信著鈔給穆圖善閱看將此由五百里各諭令知之○辛酉諭內閣前因兩廣總督瑞麟奏參廣東巡撫蔣益澧任性妄爲藩司郭祥瑞朋比欺蒙等款當經諭令吳棠馳赴廣東會同慶春查辦茲據吳棠等逐款查明覆奏一摺此案蔣益澧擅提廣東軍需局款代廣西清還舊欠並於藩運兩司籌送公費批准如詳辦理總督專政之補署營缺越俎咨商及會函入告之案並未與瑞麟商定率行會列前銜均屬不合郭祥瑞於蔣益澧札提軍需局款並未查明應否給發擅動庫款籌辦並違例支給幕友脩金詳委不合例之人代理府州員缺其籌送蔣益澧公費一案於會詳後復又另詳巡撫增入奉有總督面諭字樣並商令運司方濬頤於運庫之款又復會詳實屬遷就迎合廣東巡撫蔣益澧濫支帑項違例任情署布政使按察使郭祥瑞顯違

定例見好上官均著交部嚴加議處鹽運使方濬頤會銜詳送蔣益澧公費亦有不合著交部議處除蔣益澧支發軍需正雜各款著該督撫嚴飭軍需局趕緊分別造報外其提過代還廣西欠餉銀六千六百七十餘兩著蔣益澧先行如數繳出歸款牙釐沙田兩局濫支撫署幕友脩金歲資兩款著由經放之員賠補違例代理之肇慶府知府郭式昌羅定州知州戈聿安均著飭回浙江原省參將謝茂勝等三員著由瑞麟隨時察看如不勝任卽行參撤督署幕友劉元道張文鑑雖查無實在劣蹟仍著瑞麟畱心稽察毋得徇庇知府鄭夢玉密保之案係由蔣益澧聯銜奏請瑞麟並未書奏著卽行更正鄭夢玉著卽撤任其軍需牙釐沙田各局係由藩司專政所有會辦之司道各員著加恩免其查取職名瑞麟於郭祥瑞等籌送蔣益澧公費及郭式昌等代理員缺均經先後

批准蔣益澧咨商補署武職各缺亦皆如咨照辦均未能當時拒絕亦屬不合著交部察議仍著該督撫等將見存水陸勇丁酌量覈實減撤嚴飭地方官會同營員整頓捕務以裕餉源其裁撤之湘軍著由蔣益澧遴派委員管帶回籍以免滋擾○安徽巡撫英翰奏賊蹤由山東回竄見飭征軍由郟城迎剿得旨捻蹤見竄贛榆一帶該撫仍當懍遵前旨檄飭程文炳等聯絡淮軍會合剿辦其運防各營並著飭令實力梭巡毋稍疏懈○壬戌諭軍機大臣等劉長佑奏追擊梟匪獲勝賊蹤南竄並陳濟清追賊情形各摺片梟匪竄擾固安經鄉團官軍合力兜剿該匪竄至高陽復爲官軍截擊見已由蠡博一帶竄至定州著官文卽飭令劉長佑督率所部實力窮追並嚴檄各隊會合追截不得仍前玩泄其南路各府州地方文武亦著官文嚴檄該員督率勇團擇要堵禦毋任該

匪肆行旁竄穆騰阿亦當督飭所部分路扼截以杜北竄總兵陳濟清於富和與賊接仗時並未擊賊竟敢捏稱與劉景芬兩路包鈔日前神機營奏據各路探報及富和所稟與劉景芬約會應援並未出隊接應確鑿可據陳濟清既與劉景芬同追此賊是其遷延觀望與劉景芬相等耳目切近之地尙敢如此掩飾尤屬可惡著官文穆騰阿嚴切查明確實參奏毋稍徇隱劉長佑原片均著鈔給閱看本日據神機營奏陳管見一摺所請令馬隊專力追賊步隊分紮要隘截擊並輪番會合馬軍遞相更替援應各節著官文穆騰阿會籌辦理並著申明紀律如有畏葸不前貽誤事機者卽著嚴參照軍法從嚴治罪直隸勇隊如再有擾害地方者卽著嚴拏正法劉長佑所部楚勇仍著嚴加管束地方舉辦團練官文當飭各牧令斟酌機宜務須操縱得當毋滋流弊又據御史周恆

祺條陳剿匪機宜各摺片與神機營所奏大略相同並所請重懸賞格豫籌儲糧稽查奸匪接濟賊馬並精選將領各條均著官文穆騰阿籌畫辦理神機營原摺一件並周恆祺原摺片二件均著鈔給官文等閱看正在寄諭間據穆騰阿奏匪由高陽向西南一帶竄逸並請撥黑龍江馬隊官兵暨請將帶兵官革職各等語見在賊已竄至定州一帶著穆騰阿飭令馬隊各軍視賊所向星馳追剿以期痛殲醜類不得駐紮固安涿州等處徒事株守步軍各隊著進紮西南各要隘儻遇賊匪回竄務當分投截擊不容懈弛至直隸練軍各營仍歸官文節制調遣合力夾擊以期呼應較靈富和所部馬隊官兵馬匹間有疲瘦著穆騰阿飭令該副都統趕緊整理前進不得藉詞耽延黑龍江馬隊俟到齊時卽著神機營酌撥該都統軍營與吉林馬隊合軍進剿遵化練軍管帶官溫積

桂勦匪不力著卽行革職仍責令帶隊勦賊以觀後效將此諭知神機營並由五百里諭令官文穆騰阿知之○癸亥諭內閣英翰奏見丁父憂請開缺回旗一摺英翰向在安徽帶兵有年頗資得力自簡任巡撫以來辦理防勦事務調度均合機宜見值捻匪南北奔竄皖軍協力運防及出境援勦一切均關緊要未便遽易生手致誤事機墨經從戎古有明訓英翰著毋庸開缺賞假一月經理喪事遇有緊要軍務仍當妥爲籌辦假滿後作爲署理安徽巡撫俟軍務告竣再行扶柩回旗補行穿孝該撫當體金革無避之義移孝作忠以副委任安徽巡撫著張兆棟暫行護理○諭軍機大臣等丁寶楨奏查明黃河北岸形勢繪圖呈覽擬籌分段守凍並整練東省馬隊各摺片黃河自齊河至海口共五百七十餘里該處陸營防兵僅止莫組紳張得魁兩營水路防兵僅趙三元礮

船三十餘隻爲數過單轉瞬河水堅凍車馬皆可通行見在捻蹤已回竄諸城意欲由青州竄向濟南一帶運黃兩防勢均喫重李鴻章所部兵力較厚著勻撥南路運防各營移紮北路並著官文崇厚添籌防黃兵勇勻撥齊河迤東與東省諸軍聯絡接防以固大局丁寶楨亦當添籌兵勇密布河岸期與直軍相接不得以本境防務專諉諸各路見值事機孔迫之時若再往返籌商藉詞推諉必致貽誤大局李鴻章等務當懍遵諭旨迅籌辦理前據李鴻章奏請令丁寶楨將東省各軍在清濟一帶梭巡以備賊蹤北竄時迎頭截擊爲黃河南路屏障曾經諭令丁寶楨照辦並令於省南附近之處兼顧乃該撫昧於機宜竟令東軍遠涉沂境旣未能追擊痛剿又未能扼其回竄徒事奔馳毫無實濟見在賊之邊馬已近諸城王正起等軍甫行由沂回追已落賊後王成謙之取道

穆陵關繞截恐亦勢不相及楊飛熊一軍兵數較單豈能扼阻西北著該撫相度機宜多撥前敵數軍繞由濟南附近一帶向前迎扼務須由西而東以顧黃運兩防不可徒以追逐爲能致誤全局劉銘傳等軍仍著李鴻章嚴檄北來實力勦擊不得專顧南路置北路軍情於不顧吉林黑龍江馬隊見已全數到東此項西丹調集非易該撫務當認真訓練俟此軍技藝精熟馬匪膽壯時審慎用之不可輕於嘗試挫其銳氣帶隊營員有沾染習氣者該撫卽隨時更易勇丁中有不遵約束者卽著按照軍律懲辦黃河圖一件著畱覽將此由六百里各諭令知之○諭左宗棠奏捻逆連陷延川綏德兩城回逆同時披猖自請嚴議並續陳籌辦米捐情形各一摺捻匪由延長竄陷延川縣城前股由清澗直趨綏德州城亦被竄陷鳳汧一帶回氛復熾亟應迅籌勦辦劉松山等軍已由

宜川延安進剿卽著左宗棠喬松年庫克吉泰檄飭劉松山等分
投截剿將失守各城迅圖攻克劉典亦當派兵進剿力遏賊氛延
緩各屬與晉省僅一河之隔處處可渡著趙長齡仍遵前旨嚴飭
陳湜兼顧督率在防各軍加意防範將西岸船隻盡數提過東岸
毋令擾及晉境致干重咎河曲保德一帶尤關緊要左宗棠已飭
總兵馬陞撥兵一千名與陳湜所部親兵前往防守並著趙長齡
飭令該臬司等勤加偵探加意嚴防毋任一匪竄越其闌入安塞
之匪見向真武洞竄走恐由甯條梁邊外竄向包頭與花馬池等
匪互相勾結左宗棠已飭令陳湜騰出大同防軍前往包頭堵禦
並著裕瑞桂成趙長齡檄飭帶兵各員確探賊蹤安籌布置毋任
該匪闌入左宗棠務當妥爲布置責令帶兵各員由東北徧向西
南以期力保完善鳳隴等處回氛猖獗甘肅回氛乘機竄擾意在

與捻匪相結章掣官軍著左宗棠嚴飭楊和貴等與黃鼎等軍合力夾擊並將鳳翔及洛川白水等股迅籌剿滅毋任蔓延爲患致剿辦更難得手左宗棠統兵剿捻任令該匪竄陷延川綏德兩城殊難辭咎著加恩改爲交部議處所請籌辦捐米章程卽著照所請辦理將此由六百里諭知左宗棠庫克吉泰裕瑞桂成喬松年趙長齡並傳諭劉典陳湜知之○甲子諭軍機大臣等官文奏剿匪獲勝並暫行進省妥籌剿辦等語梟匪由高蠡奔竄定州經余承恩等追至曲陽縣境小有斬擒該匪由新樂渡河向東南敗走卽著官文嚴飭各軍四面兜剿毋令匪蹤紛竄官文進省後就近確探賊蹤與穆騰阿劉長佑速籌會剿並將省城附近防務妥爲布置一切應辦事宜須力求整頓以副委任定州等處擊賊出力員弁著官文暫行存記俟全股蕩平再行彙案請獎本日有人奏

稱總兵劉景芳之父劉坤儀素以窩賊爲事欺壓鄉民劉景芳所部多係梟匪與賊相通該總兵不能約束反多徇縱其弟劉景芬不遵調遣縱兵搶掠各等情如果屬實何以肅軍律而靖閭閻著官文按照所參各節逐細訪察據實參奏毋得稍涉瞻徇劉景芳等所部應否另派得力之員管帶及如何簡閱裁汰之處並著豫爲籌畫奏聞辦理原片著鈔給閱看將此由四百里諭令知之○諭李鶴年奏豫軍馬隊追賊槍斃任逆並西北兩路防堵情形暨襄城匪徒滋事見飭查辦各摺片善慶一軍前同劉銘傳在贛榆地方剿擒疊勝槍斃逆首任柱已據李鴻章奏報獲勝情形並將該副都統獎勵矣捻股見由蘭郊竄近諸城難保不搶渡運河希圖旁竄李鶴年已飭張曜宋慶布置運防著卽檄飭該總兵等加意防守並偵探賊蹤與淮軍聯絡聲勢杜其鋌走之謀張逆盤旋

於延綏一帶非東走晉疆卽南入豫境該撫務令馬德昭等擇要扼紮以備不虞梟匪近擾定州豫省彰衛各屬相距非遙河北之防尤爲喫緊卽著嚴飭總兵楊長春等督率兵勇晝夜嚴防毋任該匪猝乘致滋延蔓襄城匪徒程岱等因築寨起釁率眾攻撲該縣城開放火延燒民房不法已極雖據該撫奏稱該縣追獲匪犯數名而匪黨程法寬等紛紛南竄必致別生事端著李鶴年檄令總兵崔廷桂會同該縣趕緊接拏務期淨絕根株毋貽後患將此由四百里諭令知之○諭前據麟興等奏安置各旗遊牧事宜請簡辦事大臣仍擬裁撤塔城官員棍噶札勒參擬赴烏城李雲麟奏患病屬實並請將松壽簡用各摺片當諭令原議王大臣等會議具奏茲據惇親王等奏稱該十蘇木未經移完管口已於九月間西移均陸續至噶札勒巴什淖爾一帶土爾扈特汗巴顏額爾

墜圖亦於九月間抵該喇嘛行營其旗下五十蘇木餘眾亦均隨
後移徙辦理已稍有就緒但事關伊始該喇嘛一人誠恐難期周
到該將軍等請仍照前議添設辦事大臣自因目前事機不容稍
緩請卽照准等語著卽照該將軍等所請設立辦事大臣督率該
喇嘛經理卽在布倫托海適中之地建署治事均著照麟興等原
摺所籌妥爲安置惟新設辦事大臣員缺事多草創非才具練達
深明大體之員難期勝任李雲麟熟悉情形辦事勇往本日已明
降諭旨命李雲麟爲該處辦事大臣兼理塔爾巴哈台事務並調
明瑤爲幫辦大臣矣李雲麟並加恩賞給副都統銜該大臣受恩
深重務當力疾從公督率棍噶札勒參將所籌事宜實心經理以
副委任塔城舊有官員卽全行裁撤以免兩歧日後各旗遊牧應
如何分定疆界著李雲麟酌度辦理新設之缺卽作爲布倫托海

辦事大臣幫辦大臣以專責成所請鑄給關防一切經費與未盡事宜已令各該衙門妥籌辦理李雲麟等任事後所有應行籌辦事件並著隨時具奏李雲麟所保松壽一員見已因病出缺著理藩院另行酌保通曉蒙古及唐古特托忒語言文字司員帶領引見候旨發往作爲辦事司員以資任使將此諭知理藩院並由六百里諭令麟興李雲麟明瑤知之○新設布倫托海辦事大臣幫辦大臣各一缺賞庫爾喀喇烏蘇領隊大臣李雲麟副都統銜爲布倫托海辦事大臣調科布多幫辦大臣明瑤爲布倫托海幫辦大臣○賞已革雲貴總督福濟頭等侍衛爲科布多幫辦大臣○以河南秋審失出過多諭各省嗣後酌覈案情不可故從輕減○丙寅諭軍機大臣等穆騰阿奏分布步隊合軍進剿並賊匪竄越情形一摺賊匪見由定州東竄獻縣交河一帶偷渡運河穆騰阿

已將所部步隊分布霸州等處並飭洋槍步隊由獻縣過河扼截
飭富和等整隊前進該都統亦親督各營馬隊合力進剿著官文
迅卽派隊會擊並著崇厚於運河迤北撥隊嚴密扼截務將此股
就地殲除毋任再行旁竄前據劉長佑奏該匪有出口逃生之說
官文等務當分布諸軍迎頭截擊嚴扼北竄不得任令逸出邊外
更成不了之局本日據神機營奏稱穆騰阿所部及直隸馬隊不
下五六千人旗綠各營步隊亦有三四千人該匪疊被追剿所贖
不過五六百人等語官文等如果能實力督剿則見有兵力儘足
敷用黑龍江馬隊甫行進關尚未到京馬匹軍械均未整理穆騰
阿前請調撥黑龍江馬隊之處著毋庸議該都統惟當督率所部
認真剿截毋稍延宕並著官文穆騰阿崇厚嚴督帶兵各員盡力
剿辦儻有遷延觀望者卽著立時嚴參按津懲辦不准稍事姑容

致懈軍心穆騰阿另片奏劉景芬稟詞與富和互異請飭交神機營查辦等語劉景芬觀望取巧坐誤事機情形顯而易見該都統奉旨查辦此案何得任聽該員飾詞向神機營推諉著仍懷遵前諭與官文嚴速查明據實參奏不得代爲徇隱自干咎戾將此由六百里各諭令知之○丁卯諭軍機大臣等都興阿奏撥兵駐紮要地會同鄰封剿匪一招盜匪彌勒僧格等聚眾搶劫並有竄撲朝陽等情事前經諭令都興阿麟慶派兵會剿見據都興阿奏稱已派德昌等軍赴清河邊門等處駐紮著該將軍嚴飭該將領等勤加偵探如遇賊蹤竄近卽當實力近剿與熱河兵勇互相夾擊不可稍分畛域麟慶於此股匪徒究竟如何辦理見在賊蹤竄向何處有無弋獲著卽據實奏聞並著遵奉前諭迅將盜首彌勒僧格白凌阿及任義潰設法擒獲不得再事延玩致干咎戾該匪等

如被剿窮蹙難保不向東竄逸遁入吉林邊境並著富明阿派撥兵隊在吉林邊界校織巡防以杜旁竄卓索圖昭烏達兩盟仍著理藩院遵奉前諭催令該盟長等轉飭蒙古各旗認真揀派旗員帶兵一體兜拏不得觀望推諉賓圖旗匪民程學廣並著穆興阿富明阿麒慶速飭弁兵會同嚴緝務獲毋任蔓延將此由五百里各諭令知之○戊辰諭軍機大臣等官文穆騰阿奏官軍追剿獲勝並見在布置防剿情形暨賊向南皮逃竄各摺片梟匪竄至深州武強等處余承恩帶隊追擊賊由小屯過河向衡水一帶竄逸匪首蕭四經晉州知州陸邦燧拏獲正法副將李昌連追賊至獻縣賊又由交河尹家園竄向南皮官文等見派天津練軍等營分防衡水各處並飭濱河各州縣厚集團勇於南北兩岸挖溝扼賊所籌尙妥惟該匪以數百人倏南倏北雖經官軍疊次追擊並未

大挫兇鋒似此情形何日可期蒞事著官文穆騰阿崇厚嚴飭富和春壽及所派各軍覘賊所向趕緊兜剿並激勵各州縣紳團互相鈔截以期迅殲醜類毋得藉口布置徒事遷延至劉景芳余承恩因循玩寇本應立予典刑因念該二員從前尚有戰功是以將其革職畱營效力卽著官文等勒令劉景芳余承恩於一月內將南路賊股剿擊淨盡該二員如尙有天良諒能奮勇殺賊儻再仍前玩泄致賊他竄官文等卽將該二員以軍法從事不得代爲掩飾自干咎戾官文擬馳赴河間一帶布置河防著卽迅速查看妥籌防守見在賊竄南皮天津一面喫重該處爲直省完善之區尤當加意防備崇厚務飭天津所屬各州縣實力巡防並飭帶兵各員會合南北各軍迎頭截擊毋任蔓延將此由五百里各諭令知之○諭裕瑞桂成奏賊匪圖竄口外見籌防剿一摺董高二逆分

路滋擾定邊一帶逆黨由西路日漸東趨均思竄越邊外蒙兵單薄防不勝防而捻逆見又竄陷延綏包頭一帶防務尤關緊要裕瑞等已將桓昌帶防河保之兵撤回包鎮等處並將一間房駐紮大同官兵調赴包頭交馬陞分布防守卽著飭令該總兵扼要布置力遏狂氛賊蹤日偏晉邊包頭地當衝要左宗棠當速派兵勇將此股賊匪截回毋任肆意奔突致滋延蔓趙長齡亦當隨時妥爲防範以固疆圉河保防兵業經裕瑞等調回陳湜所派接防之兵著趙長齡催令迅速赴防毋得顧此失彼陝甘毗境賊匪鴟張左宗棠遠在臨潼鞭長莫及庫克吉泰何得安坐省垣不思振作著卽統帶所部出省相機剿辦儻再畏難株守卽當重治其罪至派出前敵各軍如相距較遠卽當飭其相機剿辦不得藉候指示致誤戎機察哈爾距歸綏不遠轍德恩等所帶蒙兵何以尙不見

到著杜嘎爾嚴飭該參領等剋期帶兵前赴歸綏聽候裕瑞等調遣裕瑞等當就見有兵力嚴密堵禦一面檄令各盟旗嚴守遊牧地界杜賊闖入所籌團防勸捐事宜著該將軍等實力舉行期有裨益又據文盛奏稱德勒克多爾濟病痊求賞差使一摺德勒克多爾濟病體初痊卽不自耽安逸力圖報效深堪嘉尙著卽迅赴歸綏將包頭等處防務會同裕瑞等悉心籌畫德勒克多爾濟曾任綏遠城將軍於該處情形熟悉必能辦理裕如著文盛知照該將軍剋期啟程用副委任將此由六百里各諭令知之○庚午李鴻章奏潘鼎新疊次稟稱十月二十八日在海州上莊戰勝是夜賊走贛榆三十日北趨日照之濤雒夾倉各口十一月初二日竄至諸城鼎軍於初四日追及諸城之兩城集步賊伏於樹林馬賊在平地誘戰潘鼎新親督馬步各隊分路迎擊賊大敗狂奔殺斃

甚多初五日賊折由海濱竄向諸城膠州之間初六日竄高密初七日竄昌邑初八九等日又折回濰縣鼎軍跟蹤緊追該逆一見卽走未敢接仗初十一兩日銘軍邀擊疊勝潘鼎新恐賊西竄青州遂繞由濰縣昌樂出壽光趕出賊前冀與銘軍夾擊又接劉銘傳函報銘軍由流陽高淄集取道赴莒州並知會郭松林楊鼎勳等亦由莒諸北來會剿旋據諸城縣知縣仇恩注稟稱十一月初六日副都統善慶督馬隊馳抵該境直向東北進剿劉銘傳亦統馬步全軍追至該縣東北之小石橋及高密之駐溝等處與賊接仗五戰皆捷斃賊無數又據壽光縣稟報捻逆闖入該縣東南十一日劉銘傳督軍追及彌河東岸接仗獲捷賊屍徧野逆眾窮蹙郭松林潘鼎新等亦卽帶兵至縣會合追剿各等語是

臣部各

軍均已趕至東路日有戰事

臣

已飛飭諸將乘勝兜剿使賊勿得

喘息又慮敗賊西趨檄調皖軍程文炳帶六成隊由沂州前進駐泰安適中之地若賊由萊蕪青石關沂水穆陵關翻山西竄卽據險邀截與劉銘傳等前後夾擊若賊由濟泰西走卽與豫軍守運之張曜宋慶等左右夾擊若賊回竄沂海卽回軍沂郯與方長華畱郯之四成隊策應連防庶幾面面周到至黃河防務亦關緊要疊奉諭旨飭籌協助臣苟力所能盡自係義無可辭查黃河惟張秋至魚山六十里河汊分歧溜小力薄嚴寒易凍防務最爲喫重直隸臬司張樹聲與唐訓方分段設守兵力過單臣於十月中旬函飭張樹聲來營詳細籌商因將總兵張樹屏所帶樹字三營惟勇洋槍隊撥歸該臬司調遣已由濟甯拔隊北行飭令到張秋後將打冰築牆各事相機妥辦上諭軍機大臣等賊自任逆被殲後連次受創其氣已奪正當乘此聲威合力圍剿以期節節掃蕩

藏此全功該大臣布置尙爲妥協卽著嚴督各將士環偪進攻殄此窮寇向來賊匪敗後往往拋棄輜重任令官兵取攜圖懈軍心官兵亦每因攫得賊物不思追剿以致敗匪乘間脫逃甚至被賊反擊因而受挫此等積習殊堪痛恨見在我軍疊勝誠恐行間各將士仍蹈從前惡習昧於圖功著該大臣嚴飭帶兵各員專以滅賊爲念不得徂於積習致誤戎機儻能乘此聲勢一鼓蕩平必當不次加恩懋賞酬庸若或貪財縱賊或因驟勝而驕復令賊志得逞國法具在不能以功掩罪也東軍見紮何處著丁寶楨檄飭王成謙等扼要追截與湘淮各軍合力夾擊毋任匪眾旁竄皖豫各軍均已調齊追賊誠恐運防兵單不能遏賊衝突著英翰李鶴年嚴飭河防各軍實力梭巡認真堵遏不容一匪潛渡賊旣鋌而走險南北紛竄迄無定向著張之萬督飭江境防兵實力扼剿不得

以賊蹤在東稍涉大意此時機會斷不可失著各該大臣督撫等
同心戮力滅此朝食以副委任賊去黃防雖遠亦不可不時加戒
備著官文崇厚丁寶楨嚴督防河兵勇擇要巡防毋稍鬆勁將此
由六百里各諭令知之○署兩湖總督李瀚章奏請令護理巡撫
何璟兼理藩司得旨郭柏蔭到任需時何璟見在護理巡撫未便
兼理藩篆湖北布政使著王文韶署理其按察使印務著該署督
派員署理○追予陝西陣亡提督李祥和建祠提督劉桂芳祭葬
世職○予陝西陣亡總兵官羅春福殉難知縣張銳堂等祭葬世
職○辛未諭軍機大臣等崇厚奏調撥洋槍礮隊進剿梟匪一摺
直隸梟匪馬行剽疾官軍以步追騎勢每不及崇厚見飭鄧啟元
管帶槍礮隊取道滄南追剿並仿照奉省剿辦馬賊之法調撥車
輛咨送士卒前往以期馬步合隊車騎並進辦理尙合機宜該匪

已由南皮向東南狂竄著卽嚴飭鄧啟元一軍會同富和馬隊實力進剿毋稍延緩陳濟清余承恩等緊蹙賊後何以未聞接仗著官文嚴飭該總兵等實力進剿毋徒以尾追爲事富和追賊尙稱奮勉此次崇厚復將鄧啟元洋槍礮隊歸其調遣兵力不爲不厚著穆騰阿飭令該副都統相機兜剿迅殲醜類毋任該匪竄入東境致完善之區復遭蹂躪運河迤北靜海等處崇厚當飭駐防之都司鄭明保多發偵探嚴飭巡防其趙起原帶之隊著卽行撤回布置北面防務鹽山縣典史汛弁禦賊陣亡著官文查明請卹將此由五百里各諭令知之○諭前因捻匪竄陷延綏兩城回逆滋擾定邊一帶圖竄邊外晉省西路及歸化包頭等處防堵緊要疊經諭令裕瑞趙長齡等妥籌堵禦並據趙長齡奏稱如河保邊防喫緊該撫卽親帶本標兵丁出省扼紮茲據給事中劉慶奏稱晉

防緊要河保清水河等處防務陳湜不能兼顧請飭趙長齡統兵嚴扼西北裕瑞派兵嚴扼清水河一帶陳湜嚴防永甯以下等語所奏不爲無見匪蹤逼近晉疆西北各路恐河水凍結天險不足深恃所有晉省西北防務著趙長齡懍遵疊次諭旨妥爲布置嚴飭陳湜就近將晉西防務實力籌辦並著該撫酌量情形如須出省調度卽親統弁兵前往堵禦以保完善其北路清水河薩拉齊一帶裕瑞桂成當派撥勁兵實力扼守並與趙長齡力籌堵遏飭各盟旗嚴守牧地毋稍疏失昨有旨諭令庫克吉泰統兵出省將陝甘接境賊匪相機剿辦卽著懍遵前旨迅速出省截剿不准稍涉遷延致干重咎左宗棠喬松年當力顧全局檄飭追剿各軍將延綏等處賊匪認真兜剿由東北截向西南毋任竄越鄰疆蔓延爲患劉慶原摺均著鈔給閱看將此由六百里各諭令知之○王

申諭軍機大臣等穆騰阿奏馳抵滄州勦賊獲勝並賊匪渡河竄至海豐各摺片此次梟匪東竄經穆騰阿派令都司趙啟帶隊進勦並經余承恩等於海豐所屬地方勦賊獲勝該匪搶渡龍堂橋我軍渡水稍遲致令該匪竄逸雖續經跟追未能殄滅機會甚屬可惜龍堂橋板旣窄匪眾難於暢渡不難一鼓殲除何以仍令竄逸況兵多賊寡更可兩面兜勦乃轉藉口官軍人馬較多渡水稍稽豈有賊匪可以搶渡而官軍不能分軍追勦之理余承恩等尙未能奮勇滅賊已可概見朝廷總以剋期滅賊定諸將之功罪余承恩本係革職畱營之員陳濟清亦有查辦事件若不能迅速撲滅必當重治其罪毋以追勦小勝爲遷延搪塞之計劉景芳見在何處何以未見接仗儻仍前狡猾不堪造就卽著官文崇厚懷遵前旨按軍律治罪穆騰阿亦當親自迅行追勦督飭富和等分投

進攻勒限殄滅其南路進剿官軍並著官文迅速分撥以期夾擊西路各要隘卽派兵堵禦毋任回竄該處與天津毗連崇厚亦當派兵截擊毋使擾及完善見在該匪竄入東境恐其歸入南捻大股並著丁寶楨派兵攔截免致蔓延將此由五百里各諭令知之○癸酉諭軍機大臣等據張凱嵩奏病難速痊懇請開缺本日已批諭賞假兩月調理矣該督行抵夔州遽稱患偏枯之症卽請開缺情形似近規避張凱嵩由縣令不數年間擢至兼圻受恩不爲不重若避難就易大臣存心豈宜如此駘棄章聞見較近著卽查明該督是否眞病抑或稍有捏飾據實迅速覆奏毋許遷就將此由五百里諭令知之○甲戌諭內閣吏部奏遵議蔣益澧等處分一摺廣東巡撫蔣益澧濫支帑項違例任情經吏部議以降四級調用實屬咎有應得惟念蔣益澧數年來轉戰數省尙屬著有勞

續著加恩改爲降二級調用署廣東布政使按察使郭祥瑞顯違
定例見好上官著照該部所議降四級調用兩廣鹽運使方濬頤
會銜詳送巡撫公費亦有不合著降一級畱任兩廣總督瑞麟於
郭祥瑞籌送巡撫公費等事均未能當時駁飭著罰俸九箇月均
毋庸查級紀議抵○李鴻章奏捻逆被擊狂竄入東各軍追剿獲
勝臣前已馳陳大略茲據提督劉銘傳文稱十一月初七日行抵
諸城東十餘里遇賊北竄當派善慶等馬步各隊進擊賊卽折向
東走我軍追擊四十餘里步隊至巴山馬隊至駐溝賊馬千餘回
鬪經陳鳳樓徐邦道等迎擊陣斬紅旗賊酋鄭馬糊生擒藍旗賊
目張碇柱並斃馬賊二百餘名奪獲戰馬二百餘匹該逆狂奔東
北而去其已過濰河之馬賊數百步賊千餘悉爲我軍衝散據降
賊供稱賴逆等欲沿黃撈糧再由濟甯上下搶撲運河等語劉銘

傳恐賊竄青濟黃防喫重當由安邱間道馳抵濰縣攔頭迎剿初十日賊竄濰縣東北安壩地方不虞我軍之先至也劉銘傳急起截擊適總兵唐仁廉督所部仁字三營及臣親兵營馬隊來濰會戰我軍行抵安壩日已薄暮逆眾方四散投宿當探任逆藍旗俱往東北牛李各股已至西北壽光一帶劉銘傳令陳振邦先帶馬勇與丁壽昌步隊由東路兜擊藍旗一股該提督親督劉克仁唐定奎滕學義劉盛休等步隊並徐邦道陳鳳樓馬勇由正北截剿善慶溫德勒克西由西北鈔擊復商令唐仁廉由正西繞向東擊俱約定是夜五鼓在東北會齊整隊藍旗股匪相距較近初更時已被先鋒馬勇擊破賊館十餘處大股復整隊抗拒陳振邦率勇搏戰正在相持善慶等趕上開槍轟擊滕學義劉盛休兩隊亦到該逆就莊抵拒我軍槍礮如雨劉克仁唐定奎兩軍衝入賊中擊

敗數館唐仁廉亦於正西開槍奮擊數十里槍火相接各旗賊館人聲鼎沸全行潰散維時月色正明我軍沿途追殺賊之大股卽向東北逃走劉銘傳督中軍親兵由河沿截殺三更後追抵稻田已四十餘里月落夜黑各軍分投追捕惟聞槍聲喊聲停而復起劉銘傳從火光中急行二十餘里至壽光境之仇家莊遇唐定奎一軍攻破賊館訊擒賊知卽牛遂宿處已潛逃矣劉銘傳乃發號收隊馬步各軍天明俱集唐仁廉所部擒賊最多據稱一夜追行一百餘里將賴李兩股擊散遇海而返計生擒擒匪二千餘名奪獲羸馬三千餘匹賊已四散逃竄十一日卯刻忽報西北各村賊騎紛至當派善慶徐邦道等帶隊迎擊辰刻逆眾復由東北蠶擁而來仍欲向西奔竄劉銘傳當督各營攔擊令劉克仁當白旗牛逆黑旗李逆兩股唐定奎當藍旗任錠任三厭劉三貓兩股滕學

義迎擊馬賊劉銘傳親帶劉盛休五營接應白旗賊股先敗各軍乘勢齊進賊眾全潰唐仁廉陳鳳樓各率馬勇鈔至賊前該逆涉河逃奔伏屍徧野拋棄長矛千餘件戰馬數百匹我軍復追至禹臺賊向東南敗奔日已過午因各軍追趕一晝夜苦戰百餘里人餓馬乏當令收隊適善慶陳振邦等由西北趕到接殺敗賊千餘並收降白旗賊酋盧金輝鈕洪漳尹已端黃汶瀝四股共二千餘人卽分別遠畱是役也其計擒斬賊三千餘名降散近萬人斬獲朱鳳池等大小頭目四十餘名臣查任逆斃後賊眾避兵倉皇北走欲趁我重兵在南突由青濟沿黃飽掠西趨濟甯搶撲運防幸劉銘傳兼程赴濰到在賊前與唐仁廉善慶等連夜攔擊殲賊極多實足振軍威而寒賊膽是日敗賊踉蹌南竄又經郭松林楊鼎勳迎頭痛剿殲斃無數該逆由高密安邱南趨似又回沂海一路

郭松林楊鼎勳劉銘傳潘鼎新等均銜尾分路兜追如再趕及痛
勦數仗冀可漸次廓清惟該逆多十數年百戰死黨又無屯踞定
所可以設法聚殲且追且勦半散半降計需時日目下節交冬至
河涸水凍必圖偷撲運牆以求生路臣惟嚴飭上下游運防各軍
分段責成日夜固守並請旨飭下漕督及皖豫撫臣各飭所部一
體戒備勿任死灰復燃庶藉眾力以收全功實中原大局之幸唐
仁廉所部仁字營馬隊驍勇敢戰擬先行擇保數員仰懇恩施以
昭激勸 上諭軍機大臣等逆匪竄至諸城濰縣等處經善慶劉
銘傳等軍追擊疊獲大勝斬馘甚多該逆復折向南趨意圖仍回
沂海劉銘傳等見已跟蹤追擊著李鴻章督飭該提督等乘此事
機順利之時振奮精神迅圖殄滅不可再涉鬆懈此股匪徒如能
辦理迅速全數殲滅朝廷必當渥沛恩施如不能嚴申紀律實力

殄除朝廷亦斷不稍爲寬貸也海鄭邳宿等處運防張之萬英翰當嚴督諸防軍認真扼守冬令河冰將合尤須加意嚴防以顧大局逆匪有圖竄濟甯搶渡運河之意並著李鶴年嚴檄張曜宋慶等軍嚴密巡防不可以去賊尙遠稍涉疏忽丁寶楨調撥東軍迎前截剿不令賊由青州西竄見飭王正起等軍分紮青州等處以固北路黃防所籌尙合機宜齊河以東黃河至海口一帶見亦分調東省兵勇並吉林黑龍江馬隊分段設防惟地勢綏長兵力未厚丁寶楨當嚴督該處地方官集團協助並趕築河牆以資憑守鐵門關至海口一帶地方荒僻尤當嚴爲布置毋稍大意該逆屢經挫敗忽分忽合李鴻章丁寶楨務當合力同心妥籌調度視賊所向堵禦追擊以竟全功脅從之眾並著乘此聲威設法解散剿撫兼施以孤賊勢將此由六百里各諭令知之○諭丁寶楨奏直

隸馬賊勾結鹽梟馬步千餘人竄至慶雲之崔家口圍攻黃家屯莊並探聞鹽山縣城有失陷之信又據陽信縣稟報該匪已由楊家橋竄過老黃河南岸距海豐僅十餘里並據德平縣稟報梟匪由滄州往舊州奔竄約四五百人滄州之羊三木一帶亦起有鹽匪約五六百人勢將東竄該撫已飭王成謙帶隊前往海豐剿辦並飭張得魁等嚴密兜擊卽著丁寶楨嚴檄該員等實力截剿迅圖埽蕩河冰將結黃防甚爲喫緊並當飭令沿河在防各員確探嚴防毋任竄近黃河北岸致礙防務前據穆騰阿奏報梟匪東竄海豐由龍堂橋搶渡見在竄東賊匪是否卽係此股抑係另有賊股滋事著官文穆騰阿崇厚迅速查明具奏並著官文崇厚懷遵前旨速飭余承恩陳濟清劉景芬實力追剿與東軍會合夾擊就地殲除儻任該匪竄逸致賊益形延蔓必將該員等按軍法治罪

決不姑貸穆騰阿亦當懷遵前日諭旨親往追剿並督飭富和等軍分路前進迅滅賊氛不准遲延貽誤直隸鹽山縣城是否被匪竄陷滄州羊三木地方有無另股鹽匪爲亂著官文崇厚一併查明覆奏將此由五百里各諭令知之○嚴禁崇文門稅局需索○乙亥諭軍機大臣等官文穆騰阿奏梟匪東竄會籌剿辦等情並直軍獲勝查明楚勇情形各摺片梟匪向東南竄逸闌入鹽山擾及海豐並官軍追擊獲勝情形與穆騰阿丁寶楨前奏大略相同該匪竄向一隅正可偪諸沿海地方與丁寶楨所派王成謙一軍合力夾擊務期就地殄除不可觀望遷延致令旁竄他處龍堂橋之戰余承恩陳濟清曾否實力勦賊抑有縱賊梟渡過岸情形著官文等仍遵前諭嚴密訪查毋稍徇隱劉長佑見部楚勇人數不多尙無不法確據著卽飭令楚勇將弁悉歸該革員親行管帶馳

赴前敵勦賊並責成劉長佑督飭余承恩各軍迅將此股殄盡以
贖前愆劉景芬陳濟清前案仍著官文會同穆騰阿認真確查嚴
辦以肅軍律黃河防務緊要官文當實力巡查妥籌布置勦匪各
鎮將疲玩因循尤須力加整頓毋得徒託空言是爲至要將此由
五百里各諭令知之○調李福泰爲廣東巡撫以卞寶第爲福建
巡撫李宗燾爲河南布政使胡大任爲河南按察使由內閣侍讀學士遷仍

署山西布政使○以梅啟照爲廣東按察使

由長蘆鹽運使遷

○丙子諭

內閣前因英翰丁憂時諭毋庸開缺賞假一月經理喪事假滿後
作爲署理安徽巡撫茲據英翰奏稱該署撫之父棺柩浮厝潁州
心實不安懇請賞假百日穿孝扶柩回旗安葬等語情詞迫切原
應俯如所請以遂孝思惟安徽軍務未竣英翰督率各軍防剿正
資得力未便遽易生手該署撫當移孝作忠以副朝廷委任著仍

遵前旨俟此股擒匪殄滅後再行扶柩回旗補行穿孝○梟匪陷鹽山縣城予陣亡典史陳爾魯祭葬世職○丁丑 文宗顯皇帝本紀告成予提調等官升敘有差○諭軍機大臣等左宗棠奏邠州等處勦匪情形等語回逆及潰勇土匪竄擾邠州三水宜君中部洛川一帶經譚玉龍等軍由邠州之紅崖堡等處分路進勦由正甯犯邠之甘回及另股回匪均經擊敗著左宗棠檄飭譚玉龍等軍乘勝進攻務將邠州等處之匪節節掃蕩以期漸次廓清宜君洛川之匪經劉典等軍進勦亦有斬馘賊俱敗遁廊宜之路漸通著左宗棠會商劉典激勵將弁合力兜擊毋令該逆闖入晉疆擾及完善之區陝甘毗境賊勢鴟張庫克吉泰曾否帶兵出省著卽懷遵前旨實力勦辦毋再遷延干咎左宗棠喬松年務當悉心籌商妥爲布置迅殄逆氛其綏德州失守之總兵陶茂森著知州

沈際清本日已批諭均著革職拏問卽著左宗棠按律懲辦以肅
戎行黃河冰凍陝省之賊處處可以竄晉且匪蹤已及葭州逼近
河干防務極關緊要著趙長齡督飭陳湜將沿河一帶嚴密布置
連環偵探毋稍疏虞將此由六百里諭知左宗棠庫克吉泰喬松
年趙長齡並傳諭劉典陳湜知之○諭曾璧光奏黔省地方軍務
情形請飭劉嶽昭移師貴陽助剿並催四川等省月餉一摺黔省
地瘠民貧而下游賊勢重於上游見在石阡等處已由湖南派兵
進剿上游各匪經川黔各軍分兵剿辦省城尙爲安謐第何逆是
否伏誅潘逆尙未殄滅省城究難深恃劉嶽昭著准其暫畱貴陽
與張文德分投進剿龍里貴定各匪剋期戡事卽赴雲南新任不
得遷延從事虛糜歲月致令滇省無大員督辦顧此失彼黔省賊
情半係烏合本地練勇本可剿賊惟因餉需支絀未能迅速剿除

曾璧光所奏亦係實在情形著駱秉章瑞麟李瀚章李福泰劉崐
何璟懷遵前旨按月如數撥解以濟要需毋得稍涉推諉曾璧光
於餉需解到後卽著督飭各軍認真剿辦以靖地方將此由六百
里諭知駱秉章瑞麟李瀚章李福泰劉崐劉嶽昭曾璧光並傳諭
何璟知之○諭各直省學政士子有默誦五經通曉經義者拔之
以爲研經者勸○予陝西陣亡總兵官孫士立等祭葬世職○戊
寅諭軍機大臣等麒麟慶奏剿賊獲勝見仍接捕情形一摺熱河盜
匪糾眾滋事經麒麟慶派出之佐領參將並建昌朝陽等縣地方文
武疊次接仗獲勝燒毀賊巢擒獲逆首任義潰等斬戮亦多惟盜
首彌勒僧格白凌阿見尙在敖漢旗哈巴氣地方藏匿該二匪係
著名要犯久經漏網總以蒙古地方爲逃匿淵藪疊經嚴諭緝拏
迄今仍未弋獲著理藩院行文卓索圖昭烏達兩盟長轉飭所屬

各旗會合麒慶所派兵勇認真接捕迅速擒獲以淨根株不得仍前玩忽致干重咎麒慶剿捕此股盜匪總以弋獲彌勒僧格白凌阿爲得要領若僅擒擊任義潰一犯豈能就此塞責該都統當振奮精神嚴督見派員弁兵勇儘力窮搜剋期弋獲並將逃散餘匪一體搜拏淨盡以靖亂萌奉天吉林毗連熱河邊境都興阿富明阿當遵奉前諭派兵巡緝以防敗匪竄入程廣學股匪仍著麒慶設法搜捕並檄飭賓圖王旗蒙古會同嚴緝毋稍玩忽將此諭知理藩院並由五百里諭知都興阿富明阿麒慶知之○諭沿江濱湖各省修復隄圩○己卯諭軍機大臣等丁寶楨奏梟匪被擊回竄穆騰阿奏賊竄館陶等處飭兵追剿並劉景芬追賊情形請飭直隸兼顧糧臺事務崇厚奏劉景芬馬勇滋擾請將帶隊各員懲辦各摺片梟匪在海豐縣滋擾經該地方官及陽信縣令督率兵

勇紳團疊擊獲勝並經直軍余承恩等追及會擊斃匪甚多該匪由鹽山滄州折向吳橋復由東境之德州恩縣一帶南竄臨清館陶穆騰阿見督各軍馳抵德州著卽飭令富和等帶隊跟蹤追剿並著丁寶楨飭令傅振邦及該地方文武實力堵截與富和等軍兩面夾擊賊匪敗殘之餘僅止二三百騎務當乘此機會迅圖撲滅不可再任旁竄直隸威縣一帶並著官文檄飭直軍分路截擊以杜回竄春壽一軍見紮衡水著穆騰阿飭令相機進剿遇賊卽擊並與直隸各軍聯絡聲威以期周密滄鹽一帶素爲鹽匪出沒之所並著崇厚分布天津兵勇以資彈壓兼可策應德州軍營後路神機營兵經過地方並著官文飭令該管道府州縣妥爲照料以利進行穆騰阿原片一件著鈔給官文閱看武定一帶見已無賊丁寶楨當乘此機會速將黃防築牆事宜嚴密布置毋稍疏懈

丁寶楨另片奏擒匪向北回竄分軍堵截等語擒股被剿窮迫意欲由青口等處回竄安邱高密一帶著丁寶楨卽飭王正起王心安兩軍繞前迎截務須由西北偏向東南並著李鴻章飭令淮皖各軍盡力窮追會合東軍迅圖殄滅毋任他竄崇厚另片奏營員卽得功在甯津等處募勇二百人鹽匪悍回雜處其中內有著名鹽匪吳鳳居劉三火罐等已帶赴黃河南岸著丁寶楨沿途截拏如已到李鴻章軍營卽著該大臣將該二犯查拏懲辦此後不得任聽營員赴直募勇致滋流弊將此由六百里各諭令知之○諭趙長齡奏調兵籌防冰橋遵覆晉省西北防務各摺片綏德等處之匪經左宗棠所部官軍連次擊敗奔竄西南恐由延安一路伺隙東竄則下游鄉吉石永等處仍須加意嚴防該處河流冬令易於凝涸地段縣長非認真布置嚴密梭巡不足以昭穩固見據趙

長齡與陳湜商酌調度卽著飭令該臬司通盤籌畫嚴督各路員弁探明何路有警隨時策應並於冰橋最早最險處所厚集兵力毋得稍涉大意貽誤事機賊蹤忽南忽北紛竄靡定設該逆折向北趨並著陳湜酌量移營相機堵遏河保以上直達口外已結冰橋綏遠城一帶防務尤爲緊要著裕瑞等懷遵疊次諭旨督飭總兵馬陞等各軍時加戒備察哈爾官兵已據杜嘎爾奏報卽行啟程該將軍卽飛催到防分布各口大同鎮兵仍畱內地嚴防河保一路不必遽行抽動以資堵守將此由五百里各諭令知之○是月獨緩山東濮州等七十一州縣德州等四衛東平所四場被水被旱被風被蟲被擾新舊額賦山西甯遠廳屬歙收額賦緩征兩淮富安等十四場新舊竈課減免兩浙橫浦等四場竈課